

光緒山西通志

名宦錄三

錄一之三

山西通志第一百三

賜進士出身頭品頂戴兵部侍郎兼都察院右副都御史巡撫山西提督軍務臣張煦奉

旨監修

臺司

明洪武至嘉靖

曹良臣安豐人爲行省左丞洪武元年略地至澤潞晉山西
行省平章三年封宣甯侯五年戰沒於阿魯渾河贈安國公
謚忠壯

何眞字邦佐東筦人少英偉好書劍元末據廣東爲行省左
丞明洪武元年來附眞喜儒術讀書綴文爲山西右布政使
尋封東筦伯卒

韓宜可字伯時浙江山陰人洪武時爲監察御史號剛直罷
歸已復徵至特授山西右布政使以事安置安南建文時拜

副都御史卒是夜大星隕撼馬皆驚嘶人謂宜可當之云
華克勤洪武間左布政使有政聲屢蒙勅獎諭

彭通字萬里南海人洪武中累官山西布政司參政河東運
司匿羨餘廉得之寘于法有吳允者故五臺寺僧也以才辨
受知爲陝西方面官家人橫肆偶以事干通通直其罪斥辱
之條其事以聞尋以年老致仕通爲人恭謹外柔而內剛雅
善詩爲太祖所稱太祖嘗爲贊善大夫宋濂賦醉學士歌通
廣和焉

王彰鄭州人洪武間布政司左參政廉直無私官吏咸服
王敬先偃師人博通經史工文辭洪武間以賢良舉授山西
布政司左參議

宋文祥符人性資醇厚學行兼備洪武中以隱士薦送京師

授山西按察司副使廉能稱著風紀肅然

樊鎮考城人初授御史振揚風紀有能聲洪武間任山西副使永樂中擢湖廣右參政調山西宣德間陞右布政使所至廉幹勤敏大得時譽

張孟兼浦江人與修元史劉基嘗爲太祖言今天下文章朱濂第一其次卽臣基又次卽孟兼用爲山西僉事廉勁疾惡糾摘奸猾吏民間張僉事行部凜然墮膽聲聞於朝擢山東副使抗布政使僧吳允被害

宋禮永甯人洪武間按察司僉事持法嚴明人莫敢犯陞陝西布政使後遷工部尙書

呂震字克聲臨潼舉人洪武間按察司僉事明敏有爲聲譽大振永樂中厯官禮部尙書

以上洪武年

鄭辰字文樞浙江西安人永樂四年進士十六年由御史超遷山西按察使糾治貪濁不少貸潞州盜起有司以叛聞詔發兵討捕辰方以事朝京師奏曰民苦徭役而已請無發兵上然之還則屏騶從親入山谷撫諭盜皆感泣復爲良民禮部侍郎蔚綬轉粟給山海軍辰統山西民輦任民勞多逋耗綬令卽山海貸償之辰曰山西民貧而悍急之恐生變不如綬之使自通有無用其言卒無逋者內艱歸軍民詣御史乞留御史以聞服闋還舊任宣德三年召爲南京工部右侍郎初命舉方面官堪內任者蹇義以九人薦上素聞辰名卽眞授餘多試職正統時嘗與豐城侯李彬轉餉大同歸卒辰重義輕利與山西同僚杜僉事有遺言杜卒爲治喪資遣其妻

子

韓偉瑞安人永樂中太學生擢監察御史巡歷有聲陞河東
鹽運使以清慎見稱卒於官

喬誠朝邑人太學生歷官勤能陞山西左參政處心忠信措
事寬平人稱爲長者

趙紳歷城人舉人永樂間授御史激揚有聲以劾尙書金連
出爲揚州同知陞山西參議卓然有聲轉江西以老疾致仕
朝廷念其廉介賜半俸養老

蔡彬武邑人永樂中由太學生歷任勤能陞山西左參議有
惠政及民

周道朝邑人永樂間舉人山西僉事有惠政卒於官喪出適
道哭奠三日不得行

蕭伯剛邠州人永樂末舉人歷任山西僉事能振揚風紀致

仕歸

以上永樂年

張政廣德人洪熙間以御史巡按山西明年復命陞本省按察使賜鈔一千緡馳驛赴任政暇以經學授士子士子多所拔擢

于謙字廷益錢塘人永樂十九年進士爲御史宣德中上手書謙名授吏部超遷兵部右侍郎巡撫河南山西年僅三十三謙感上知徧歷諸州縣察時所急事所宜興革卽具草言之一歲章數上三楊在政府皆重謙奏朝上夕報可英宗立奏免山陵役夫萬七千人正統初數上便宜事遇水旱輒立奏六年疏言今河南山西積穀各數百萬計臣欲於每歲三月令府州縣申報缺食下戶隨分支給先菽秫次黍麥次稻俟秋成償官而免其老疾及貧不能償者府州縣吏秩滿當

遷卽預備糧儲未足不聽離任仍令風憲官以時稽察詔可
自是儲待充溢境內數千里民無水旱憂又以大同懸塞外
請別設御史治之而盡奪其鎮將之役卒私墾者爲官屯邊
用亦溢在官九歲遷左侍郎食二品俸謙每議事京師空行
無所齎權要多憾之通政司李錫阿中官王振指劾以久不
遷怨望遂下法司論斬繫獄三月山西河南吏民伏闕上書
請留謙者以千數周晉諸王亦言之乃赦謙以大理少卿復
往巡撫謙前後在任十九年兩丁內外艱詔皆許歸治喪旋
起復至正統十三年以兵部左侍郎召明年遂有土木之役
晉兵部尙書功在社稷宏治初贈太傅謚肅愍萬厯中改謚

忠肅

徐達字志道歸德人洪武丙子舉人宣德中以湖廣按察

使授山西時永達方居憂詔奪情特賜璽書遣之永達弱冠登鄉榜由教諭洊歷翰林侍經筵爲輔導官尋遷鴻臚少卿皆稱職及涖山西劾治苛暴擒捕奸貪雖強禦不避威望大著嘗持節王國所與鞍馬金幣襲衣悉辭不受奉使交趾所贈貨寶值千金絲毫無所取比卒不能具棺故所至能樹風節云

黃常祖字邦經世居閩之涵江永樂壬辰進士歷官部曹有聲後薦陞山西布政使司左參議并晉地瘠民貧值歲凶多流亡常祖奏乞招徠聽免徭役三年悉復業平陽界上有盜聚千人爲害常祖推誠諭之不旬日皆降附正統十年致仕歸

劉珪字廷侯長洲人宣德時以應天鄉薦授刑部主事遷山

西按察僉事提督屯田操履清白人不得以私干之性孝友
工詩年五十乞致仕著有完菴集

羅亨信字用實東莞人永樂二年進士宣德中爲御史清軍
山西有聲有薦其堪方面者命食按察僉事俸待遷正統中
以右僉都御史巡撫宣府大同汰諸衛冗官老弱者四百八
十餘人參將石亨請簡大同民三之一爲軍亨信奏止之晉
右副都御史巡撫如故時遭官度二鎮軍田一軍八十畝外
悉徵稅五升亨信言永樂時詔邊軍盡力墾田毋徵稅陛下
復申命之今奈何忽爲此舉塞北諸軍防邊勞苦無他生業
惟事田作每歲自冬徂春迎送瓦剌使臣三月始得就田七
月又復刈草八月以後修治關梁計一歲中曾無休暇況邊
地磽瘠霜早收薄若一收稅則民不復耕必致竄逸上納其

白圭

初晉左副都御史致仕卒

以上宣德年

白圭字宗玉南宮人正統七年進士除御史巡按山西辨疑獄百餘部檄朔州課鈔益三之二圭疏爭復三十取一之舊從駕土木脫還景帝命往澤州募兵後仕至兵部尙書卒贈少傅謚恭敏

左鼎字周器永新人正統七年進士巡按山西英宗北狩悉心畫戰守時兵荒游臻請蠲太原諸府稅糧停大同轉餉夫以蘇其困也先請和抗言不可引宋景德靖康事爲鑒鼎善草章奏京師語曰左鼎手練綱口後爲左僉都御史卒

陳泰字吉亨光澤人舉鄉試第一正統時爲御史巡按山西乞量增羣臣祿廩格不行泰素勵操行三爲巡按懲奸去貪威稜甚峻邸王臨國于謙薦守紫荆關以關門不守論辟省

之景泰元年遷右僉都御史節制紫荆倒馬諸關後謝政卒
王綱上高進士正統間爲右布政使爲人行止端方執法不
撓自御史厯官布政所至有聲後致仕

楊璿字叔璣無錫人正統己未進士通敏有操執不以利害
爲趨舍由主事遷郎中晉山西右布政定民差役均平無弊
晉都察院右副都御史巡撫河南卒于官

石璞字仲玉臨漳人以御史遷江西按察使晉山西布政使
剛直有治才刁民奸吏皆畏方議修堯廟一夕大風拔木積
廟前皆棟梁材後進工部尙書正統時進太子太保改兵部
尙書景帝初出募山西義勇又出理大同軍餉後掌南京都
察院事成化初致仕歸

王琦字文進浙江仁和人永樂中舉人授汝州學正正身範

物生徒爭自濯磨正統中陞山西按察僉事提督學校士風丕變以母憂去

鮑時安福進士正統間任右參議政餘以春秋之學淑人朱鑑字用明晉江人舉鄉試宣德中用薦爲山西左參政居數年晉右布政司郈王監國就擢左副都御史巡撫其地上言宜重將帥事權悉罷監軍中貴整散兵募勇士重懸賞格鼓勸義旅上嘉納之時寇窺塞下鑑日夜爲守禦計修築各州縣及沿邊城堡聚置騎甲計萬餘召募壯勇萬七十八人旣而移鎮雁門寇引去三年侍郎鄒幹黜陟山西多所論劾鑑請召幹還論鑑徇護召還院致仕卒

以上正統年

年富字大有懷遠人本姓嚴後訛爲年以會試副榜注銓景泰二年爲右副都御史巡撫大同提督軍務時經喪敗法度

廢弛叢弊尤甚富一意拊循奏免秋賦罷諸州縣稅課局停
太原民之轉餉大同者武清侯石亨武安侯鄭宏武進伯朱
瑛令家人領官庫銀帛糴米實邊多所乾沒富首請按治詔
宥亨等抵家人罪亨慮久雨壞關城潛遣卒十餘人行視卒
遂越關抵大同富復劾亨專擅亨輪罪已削襄垣王府菜戶
又杖其廚役之署教授事者已又劾分守中官韋力轉參將
石彪及山西參政林厚罪豪家愈側目相與撫富罪巡按御
史白其誣遂不問當是時富威名重天下而當事大臣于謙
等力保持之故得行其志母憂詔乘傳奔喪起復視事七年
富上言往時諸邊雖設鎮守監鎗內官其數猶少自土木變
後諸邊悉增如陽和天城諸處一城二人擾民殊甚今邊務
肅清請減汰格不行英國公張懋及鄭宏各置田莊于邊境

成化軍耕種富勅之還軍于伍天順元年革巡撫官富亦罷
歸項之石彪以前憾誣劾富逮下詔獄李賢稱富能祛弊上
曰此必彪爲富抑不得遂其私耳已而事果無驗令致仕後
召任戶部尙書卒謚恭定

馬文升字負圖鉞州人景泰二年進士授御史出按山西風
裁甚著仕至吏部尙書卒贈太傅謚端肅

倪敬字汝敬無錫人正統十三年進士擢御史景泰中巡按
山西奏罷入粟補官令戍將侵餉者悉按治豪猾斂手後復
以直言謫典史遷督府都事卒

劉世忠字摠誠山東濮州人景泰時授監察御史累官山西
參政成化癸卯甲辰歲大饑民嘯聚垣曲山中千餘人剽掠
鄉村世忠單騎入賊壘推赤心撫諭其衆曉以禍福衆感泣

棄兵器羅拜遂爲良民後陞都御史巡撫延綏

葉盛字與中崑山進士景泰間以兵科給事中遷山西右參政協贊獨石等處軍務上興革事宜八條次第行之又買牛種付戍卒不任戰者屯田以給軍中諸費復立社學建義冢設暖舖拊循有方邊人歡洽天順八年巡撫宣府會大舉入河套議增兵設險或請大舉搜套沿河築城堡抵東勝徙民耕守其中勅盛往議方略上言搜河套復東勝未可輕議增兵守險可爲遠圖上從之轉吏部左侍郎卒謚文莊

祝顥字維清江南長洲人正統間進士景泰中任山西布政司參議專督糧儲時大寇之後倉府空竭飢民流散顥招亡撫存條法曲盡進階右參政仍督糧儲以晉俗少文思振起以儒術廣選俊秀充生徒躬親教授表揚遺德以爲法式嘗

洪洞地里傳舍皆以臯陶爲名褻古聖人因爲改正竝建
祠葺墓復修二賢祠于聞喜祀裴趙兩公新明道先生祠于
澤州以伊川先生郝左丞經配焉天順中汾州妖賊作亂就
擒首謀止十六人顯以罪坐首事不欲多傷善類又以改年
僭號不可僅以盜聞乃以十六人爲謀反上奏得旨如議顯
行部封內往往駐軍問民間利弊力爲興除過高山大川及
古昔名人宅里祠墓登臨謁弔一時詩版流傳海內皆推大
手居參政七年上疏請歸歸二十年卒

王璠字延瑞甯遠人景泰間進士性亢爽有局幹尤習吏事
累擢山西布政司左參議分守冀北道時北部出沒不時戍
卒餽餉恒虞不繼璠多方調畫邊鎮荷以爲重

以上景泰年

李侃字希正東安人正統七年進士天順二年復設山西巡

撫遷侃右僉都御史任之奏言塞上之地與窮荒無異非生長其間者未有能甯居而狎敵者也今南人戍西北邊怯風寒聞寇股栗而北人戍南亦不耐暑多潛逃宜令南北清勾之軍各就本土補伍人情交便戎備得修時不能用奏發巡按李傑罪傑亦許侃按傑事有驗除名侃無贓罪獲宥六年考察屬吏奏罷布政使王允李正芳以下百六十人因言諸臣年與臣若不堪任事者臣悉退之臣亦當罷詔不許侃性剛方力振風紀貪墨者屏跡冬母喪歸軍民擁泣至不得行家居卒子德仁進士河東鹽運使

李秉字執中曹縣人正統元年進士天順中復設巡撫大臣薦秉才以右僉都御史撫大同都指揮孫英先以罪貶秩還衛總兵李文安引詔令復職秉至卽斥之神將徐旺領騎卒

操練以耻不勝任解其官怨謗紛起會天城守備中官陳
例久病秉請易以羅付責專擅徵下詔獄指揮門達訊之斥
爲民憲宗時起左都御史成化二年秋命自遼東抵大同整
飭邊備更將帥申軍令而還未幾命爲總督數破敵勞以羊
酒賜麒麟服加太子少保入爲吏部尙書致仕卒贈太子太
保謚襄敏

李儀涿州人以薦舉進英宗初始設諸邊巡撫僉都御史丁
璠方督大同宣府軍儲而儀以右僉都御史巡撫其地盛有
所建置號令一新時欲遣方政楊洪襲迤北諸部儀乞勅政
等無窮追不納督糧參政劉璉不職儀劾之璉亦誣儀適參
將石亨欲奏鎮守中官郭敬罪先咨儀儀誤緘咨牒于核餉
主事文卷中戶部以聞亨敬遂相訐命儀璉自陳而切責敬

等璉止停俸二歲儀雖引罪自負其直詞頗激被劾下吏瘼
死儀居官廉謹邊人素德之建昭德祠以祀璉上元人永樂
中進士由御史擢居是職後爲副都御史卒所至有政聲
王宇字仲宏祥符人童丕時日記萬言巡撫于謙奇之登正
統四年進士天順二年爲右副都御史巡撫宣府命兼撫大
同石亨及從子彪驕恣大同其舊鎮地微索尤橫宇抗疏論
其奸乞置之法疏雖不行聞者敬憚督餉郎中楊益不能備
芻蕘爲宇所劾戶部庇之宇竝劾尙書沈固等皆輸罪晉大
理卿卒

王越字世昌濬縣人善射有大略登景泰二年進士天順七
年大同巡撫韓雍召還上難其代喟然曰安得如雍者而任
之李賢因薦越召入見上喜其岸異卽擢右副都御史以行

甫至遭母憂奪情視事越乃繕器甲簡卒伍修堡砦爲經久計成化三年寇入塞督將士禦卻之秋兼巡撫宣府五年冬寇入河套延綏巡撫王銳請濟師詔越帥師赴之破寇六年正月還尋復援延綏晉左副都御史又晉右都御史七年越以方西征辭大同巡撫詔聽之十六年出師援榆林越提督軍務與太監汪直將輕騎循塞垣而西至大同聞敵帳在威甯海子乃盡選宣大兩鎮兵二萬出孤店潛行至貓兒莊分數道值大風雨雪晦冥進至威甯寇猶未覺掩擊大破之斬首四百三十餘級獲馬駝牛羊六千封威甯伯十七年復與直帥師出大同適寇入掠追擊至黑石崖擒斬百二十餘人獲馬七百匹晉太子太傅五月大同總兵官孫鉞卒卽命越代之而以直總鎮宣大後加少保兼太子太傅卒贈太傅謚

襄敏

賈俊字廷杰束鹿人以鄉舉入國學天順中選授御史巡山西有聲成化二十一年拜工部尙書加太子少保致仕卒邱陵字志高蘭陽人宣德四年舉鄉試第一由教諭遷平鄉知縣時山西歲饑民有流入境者陵附循之給以閒田使食其力歸之者千餘戶天順四年以政績卓異擢山西左布政使成化初李秉爲吏部尙書執法不阿學士彭華從子求京秩不得憾秉喉同鄉給事中蕭彥莊誣劾陵坐逮上疏奏辯事白彥莊免官陵亦致仕著有嬰教聲律二十卷芸菴集三十卷子輅山西布政司左參政

謝祐字廷佐桐城人宣德乙卯鄉薦正統丙辰成進士歷任部曹奉勅督山西邊儲接濟大同宣府天順戊寅陞山西右

布政使涖官慎勤存心仁厚凡所設施務使民霑實惠前後

志操始終一致致仕歸有宦游彙行世

以上天順年

朱瑄號鈍菴華亭人正統間進士以御史出巡累擢山西僉事屬吏有不法者聞風而去尤多平反冤獄清軍伍明恕不苛無隱沒誣枉之弊才名益起凡分巡官缺瑄輒兼領其事一日至大同有中貴親幸者入境欲射獵爲樂瑄與語遂斂威而去邊人不至驚擾丁外艱服除復任山西成化五年始擢副使又二年上章請老家居三十年而卒

雷復字景暘湖廣甯遠人成化七年爲右副都御史巡撫山西繼李侃後端恪守法得軍民心敗寇紅紗煙再敗之煙寺溝石人村賜勅獎勞時山西大祲而令預徵芻餉轉輸榆林復上言自山西至榆林道路險絕民齎銀往易價翔踊不免

稱貸償責多破產今雨雪愆違饑民疾病流離困悴萬狀而應輸綾帛藥果諸物又不下萬計乞依山東例蠲除仍發帑賑贍上從之及發金三萬不足請鬻鹽四十萬引竝令民入粟授散官皆報可卒於官

秦紘字世纓單縣人景泰初進士成化十三年巡撫山西奏鎮國將軍奇澗等罪奇澗父慶成王鍾鑑爲奏辯且誣紘上重違其意逮紘下法司治事皆無驗於是奪奇澗等三人爵王亦削祿三之一而改紘撫河南後仕至戶部尙書致仕卒贈少保謚襄毅

何喬新字廷秀江西廣昌人吏部尙書文淵子也景泰五年進士成化十六年巡撫山西邊地軍民每出塞伐木捕獸喬新言此輩苟遇敵必輸情求生皆賊導也宜毋聽闌出犯者

罪守將詔可敵犯塞借參將支玉伏兵灰溝營擊斬甚衆歲
饑奏免雜辦及戶口鹽鈔十之四劾僉事尙敬劉源稽獄請
勅天下斷獄官淹半載以上者悉議罪上稱善亟從之召拜
刑部侍郎山西大饑命往賑活三十餘萬人還流冗十四萬
戶仕至刑部尙書致仕卒贈太子太保諡文肅

左鈺字廷珍阜城人以舉人授監察御史陞陝西環慶兵備
僉事遷副使成化十九年召爲都察院右僉都御史巡撫山
西二十二年復命巡撫兼都督雁門諸關通敏有權略初韓
王取假子自紹事敗連歲不決鈺爲僉事承按之一訊得實
時稱其才致仕卒

李敏字公勉襄城人景泰五年進士成化時歷山西右布政
使累擢右副都御史巡撫大同敵騎出沒塞下掩殺墩軍敏

伏壯士突擒之修治垣塹敵不敢犯大同居極邊孔廟無雅樂敏上奏獲頒賜焉居三年召爲兵部右侍郎累遷戶部尙書先是敏在大同見山東河南轉餉至者道遠耗費乃會計歲支外悉令輸銀民輕齎易達而將士得以其贏治軍裝交便之至是并請畿輔山西陝西州縣歲輸糧各邊者每糧一石徵銀一兩以十九輸邊依時值折軍餉有餘則召糴以備軍興上從之自是北方之稅皆折銀由敏始也宏治四年歸卒贈太子少保諡恭靖

孫洪字伯大山東昌邑人景泰間進士巡撫大同以威甯海子之捷進左副都御史食正二品俸尋巡撫河南

余子俊字士英青神人景泰二年進士成化二十年以戶部尙書太子太保兼左副都御史總督大同宣府軍務冬還朝

二十一年復出行邊先是子俊巡撫延綏東起清水營西抵花馬池延袤千七百七十里咸鑿崖築牆掘塹其下連續不絕每二三里置敵臺崖砦爲巡警之所又於崖砦空處築短牆橫一斜二如箕狀以瞭敵避射城牆內地悉分屯壘及巡歷宣大請以延綏邊牆法行之宣大因歲歉而止比復出銳欲行之言東起四海冶西抵黃河延袤千三百餘里舊有墩百七十應增築四百四十墩高廣皆三丈計役夫八萬六千數月可成詔明年四月卽工而歲比不登上下難之子俊又欲責成於邊臣而已不親其事謗議遂起至冬疏請遷改左都御史巡撫大同中官韋敬讓子俊假修邊多侵耗命工部侍郎杜謙勘之敬又劾子俊私恩怨易將帥下兵部覈侍郎阮勤等爲白命謙并按問而中朝多欲傾子俊子俊危甚謙

還奏易置將帥如勤等言所費無私然爲銀百五十萬米菽二百三十萬二十二年二月遂落太子太保致仕去二十三年上悟子俊無罪而修邊功不可泯復召爲兵部尙書宏治二年卒贈太保諡肅敏子俊嘗曰大臣謀國當身任利害豈得遠怨市恩爲自全計其所修邊垣迄爲數世利云

鄭甯字志道祥符人正統間進士成化間巡撫宣府時盛暑築城堡工役數千人天久旱下令罷役是夕大雨積事有秋邊人胥悅以內艱歸奪情起復再至鎮軍民咸迎拜喜曰我公來矣逾年移大同在邊七年疆場無事延見境內士大夫咨詢民瘼次第舉行以疾致仕三上始得請其歸也囊無餘貲閒居十四年服食淡泊數至匱乏詔有司歲給米四十石宏治間卒

李芳利津人成化間進士初授監察御史劾尙書薛遠滕昭
出按山西值歲饑奏發內帑賑之時汪直恃寵命人誣告尙
書項忠不軌事命王越往按之越薦芳同往因語同事者曰
吾甯得罪於權幸豈可得罪於天厯官按察使發奸摘伏吏
畏如神

張進祿清澗人成化間進士授御史劾彈不避權貴巡按山
西榆次有巨俠怙惡構黨魚肉小民廉知之悉寘於法境內
遂安

王臣江西吉水人成化間以河東鹽法爲稅額所關懼滋弊
特設巡鹽御史臣以舉人膺命冰蘖自持悉心經畫具得肯
綮因爲築垣塹以防盜定額課以足邊歲甫周鹽政大舉及
將代商民數千人匍匐闕下願復留得旨命允以勞獎病卒

商民建忠愛祠與鹽池之神並祀

周宣龍溪進士成化間太僕少卿考牧惟勤九年考滿陞正卿代州之設寺卿自此始宣有學行政暇與生徒講解多所成就今代士業書經皆所傳授

孟淮博野人進士成化間河東鹽運使因池鹽旁行秦豫法難盡行且占種奏討者多不勝掣肘之慮請如淮浙之例遣侍郎監臨積弊一清

胡謐浙江會稽人成化中以進士累官按察司副使提督山西學政謐嗜學於書無所不窺論諸生文高下悉當嘗以禮待刑邇之公所藏書於學宮因碑以示諸生諄諄以德行文章事功爲重不但欲誇多闢靡爲書肆而已山右故無志謐以身秉文衡文獻之責于是乎在特爲草創之後轉本省參

政

楊一清巴陵人數歲能屬文應奇童舉至京得召見十八成
進士授中書舍人成化間任山西提學僉事宏才碩望師範
端嚴人才高下甄別不爽表節義禁浮華士人翕然宗之累
官至大學士贈太保謚文襄

敖山字靜之山東莘縣人成化間進士拜翰林編修爲時推
重出提督山西學校所著有石稜傳粲然稿先天手冊晚年
數學精到

李騫字邦傑華容人宣德王子鄉貢成化初晉山西右參政
爲人廉直敏慎嗜學工書所居輒爲人重歸卜居黃湖山石
田茅屋而已足跡不履城市

王盛字懋德韓城人成化進士爲人孝友介廉崇正闢邪以

給事中陞山西參政暇日惟以教人爲事河東一時名士出其門者甚多因目爲關西夫子所得俸祿盡散族人親識而家無餘貲所著有竹室詩

石玉璫城人成化間山西副使發奸摘伏人稱神明疑獄片言而決全活甚衆二子玠瑤登進士遂致仕

顧佐字良弼臨淮人成化五年進士宏治中爲右僉都御史巡撫山西宗室第宅官爲繕費不貲請悉令自營治正統末權發太原平陽民戍邊後遂久不代奏令代遷正德初代韓文爲戶部尙書劉瑾憾文部有故冊選欲以爲文罪逼佐上其事佐不可奪俸乞歸卒贈太子太保

張敷華字公實安福人天順八年進士宏治初爲右副都御史巡撫山西中道奔喪服闋還故官部內賦輸大同困于折

價請太原以北利轉運者仍輸米民便之正德初爲左都御史致仕卒贈太子少保諡簡肅

許進字季升靈寶人成化二年進士宏治元年爲右僉都御史巡撫大同小王子久不進貢遣使干五百餘人款關進以便宜納之請於朝詔許五百餘人至京師已而屢侵邊進被劾不問尋復窺邊進整軍待之新甯伯譚祐以京軍援寇乃遁去又乞通貢進再爲請上許之時大同土馬盛強邊防修整貢使每至關率下馬脫弓矢入館俛首聽命無敢譁會進與分守中官石岩相訐岩徵還進亦謫兗州知府十三年火篩大舉犯大同邊將屢敗勅進與太監金輔平江伯陳銳率京軍禦之進仕至吏部尙書致仕卒贈太子太保諡襄毅

史琳字天瑞成化丙戌進士性坦夷宏豁不設崖岸喜談兵

爲給事巡按多建白三爲提督初赴宣府大同值寇退治兵食以防其後尋以提聞宏治乙丑宣府失利劇命出師琳與大帥分駐宣府大同諸路斬獲以百計捷再上褒論如初特命中官迎勞於關錫賚甚厚終都察院右都御史卒於官贈太子太保賜葬祭

洪漢字天章成化壬辰進士巡撫大同參贊軍務撫恤軍民搜剔蠹弊風紀振而邊境肅然上疏極言便益地方八事而增守備以專責任演神機以期實用置方田以遏北騎寬住俸以惜逃官尤爲八事中切要者因觸忤中官回籍

歐信字孚先蘄州人成化甲辰進士修幹美儀邊幅整峻以郎中督餉大同增置東大有倉乘賤易粟備用歲積至五十萬石歷陞右副都御史巡撫大同始至卽選將訓兵綜理屯

牧修舉廢墜未逾年卒

王獻臣字敬止其先吳人籍錦衣衛宏治六年進士爲御史巡大同邊還言自威遠失利士無戰心今復令修築邊垣豈勝畚鍤勞宜量修要害悉罷其餘且亟正諸將姚信陳廣閉營避寇及馬昇王杲秦恭喪師罪悉蠲大同延綏旱傷逋賦以寬軍民多獲允東廠以非理訐奏遂杖謫人皆寃之終知縣

劉瑀字汝器蠡人成化二年進士以御史擢蘇州知府陞山西右參政會澤潞沁汾歲饑盜起瑀招徠賑貸民頗賴之後陞山西左布政使遷右副都御史宏治六年致仕卒

藍章山東卽墨人宏治中以監察御史巡撫山西風裁自持彈劾不避權貴轉左僉都御史忤瑾左遷瑾敗起巡撫陝西

劉平巨寇漢中人立祠祀之

李蕙字德馨當塗人成化己丑進士由給事中累擢山西右布政使踰年轉左布政使公移出入吏多緣以爲姦蕙痛治之姦弊盡息惠澤多及於民有畫像以奉之者癸丑陞右副都御史督南京糧儲卒於官

陳震字文靜慶陽人成化丁未進士爲御史風裁凜然丁巳陞山西按察副使務以德化壬戌陞按察使憲度益修正德初左遷兩淮鹽運同知終兵部右侍郎兼左僉都御史致仕卒

以上成化年

張泰字世亨祥符人成化戊戌進士以御史監河東鹽課有勢要撓法爲奸疏劾去之巡按山西劾罪貪酷吏若干人軍民稱快後晉右都御史總制三邊乞休命未下而卒

楊文卿浙江鄞縣人進士宏治間授山西提學僉事操履端嚴勸懲有道斥邪術毀淫祠申禁約建社學教化大行

王鴻儒字懋學南陽人成化末進士累遷山西僉事晉副使俱督學政居九年士風甚盛孝宗嘗語劉大夏曰藩臬中若王鴻儒他日可大用也正德改元謝病歸後累遷南京戶部尙書卒諡文莊

李俊字子英岐山人成化五年進士爲吏科都給事中二十一年以星變疏劾梁芳韋興陳喜李孜省鄧常恩繼曉及卿貳等語尤切尋以事出外宏治中累官山西參政卒

李景繁字邦泰儀封人成化中進士由三原知縣累轉都水司郎中管漕河有治績宏治六年遷山西右參議理儲行塞上凡十年而餉運不闕擢四川參政以疾乞致仕

邱瑤字仲玉蘭陽人陵子成化壬辰進士由給事中累遷至山西布政司左參政分守大同沈靜博學建白施設多中民隱病卒於官家無餘貲歸無室處人以是高之

吳道甯字世安河內人成化戊戌進士歷官以慈愛爲本節民財力爲先宏治十一年陞山西按察司副使整飭雁門等三關兵備創築甯武新城設甯武所及沿邊堡塞募軍充實武備一新邊人有賴後以疾歸

徐節字時中貴州衛人成化壬辰進士由內鄉令擢御史風裁凜然丙寅進右副都御史巡撫山西廉謹守法無一事擾民會逆瑾擅政見忤削秩罷歸瑾誅詔復職致仕

姜洪字希範廣德人成化十四年進士爲御史孝宗初論辨邪正斥大監蕭敬內閣萬安劉吉學士尹直尙書李裕等語

尤切直吉假督漕爭文移事貶夏縣知縣正德二年累遷山西右布政使劉瑾索賀印錢不應矯詔罷歸瑾誅復起七年以右副都御史巡撫山西未滿歲卒洪厯官四十載居無垣牆

李鉞字虔甫祥符人宏治九年進士正德中爲右僉都御史巡撫山西大修雁門十八隘興延綏援將安國杭雄敗寇于岢嵐加俸一級尋討平內寇武延章等嘉靖中仕至兵部尙書卒贈太子少保諡恭簡

楊澄射洪人進士巡撫山西約已厚士繕邊修具富儲選將勤蒐練廣開諜民賴以甯

顧璘字華玉上元人宏治九年進士厯山西巡撫有聲後遷南京刑部尙書卒璘少負才名與何李相上下

謝綬字朝章朝城人成化甲辰進士授任邱令歷陞都察院右僉都御史巡撫大同時也先旃廬百餘里保聚塞下數入侵盜綬至鎮簡練軍實墾田殖穀威名流聞部落遠徙不敢近塞又設伏險阨寇騎零抄出入輒要擊之曰對將吏商軍務方略夜治文書按圖籍指畫山川險易及寇中曲折皆如身履好撫卹士卒調給芻糧燕犒無不周至屢奉璽書褒美以勞成疾卒於軍府訃聞詔守臣臨祭如例

楊志學字遜夫徐州人宏治六年進士巡撫大同邊人愛之累官刑部尙書卒諡康惠

陳察字原習常熟人宏治十五年進士爲御史直聲震朝野累官山西左布政使有聲後巡撫南贛歸卒察居官廉旣歸敝衣糲食而已

以上宏治年

張士隆字仲修安陽人宏治十八年進士正德六年爲御史巡鹽河東劾貪吏鑿平青石槽又建正學書院興起文教後爲陝西副使卒

胡止羅山人進士正德六年以監察御史巡鹽河東方肅謹事適流賊擾亂所至屠掠將至運城運人以城陋欲潰止曉以忠義治兵繕城爲死守計賊聞有備不敢近士民賴以安堵立祠祀之

朱裳字公垂沙河人受學崔銑登正德九年進士擢御史巡鹽河東錢甯遣人牟鹽利禁不予累官總理河道卒諡端簡許銘宛平人進士正德間任太僕卿爲政暇輒與代士講論經史立課法以勸勵之一時士嗜文學科目多出其門

孫修字用吉邯鄲人宏治乙丑進士由部曹歷陞山西按察

使公廉有威上下俾之後巡撫湖湘改南京操江致仕歸黃珂遂甯人進士正德間山西按察使具經緯才有雅操辨枉伸抑執法公平吏民懷服累官工部尙書

高友璣樂清人進士正德間任山西按察使堅持風憲不畏強禦獄平允民無冤抑至今稱之陞副都御史巡撫大同陸深字子淵上海人宏治十八年進士歷祭酒充經筵講官言講官撰講章閣臣不宜改竄謫外晉山西提學副使有聲仕至詹事卒諡文裕

陳鳳梧江西泰和人正德間以進士任山西提學副使鳳梧高才博學持身廉潔教士以德行爲先冠婚喪祭悉令遵用朱子家禮所頒條約數十款皆身心切務論文復極詳慎妍媸美惡不爽毫髮每引諸生至堂下教以明體達用之學後

官兵部尙書

馬卿林縣進士正德間提學副使端嚴有體閱士校文雖寸長必錄褒獎行義遠近向慕之歷官都御史

張敏字時勉嘉興海鹽人鄉舉籍在雲南宏治己未除蘭州知州累陞山西布政司右參政雄武有謀略遇事敢爲摘人隱伏多曲中致仕歸

王崇文字叔武曹縣人珣第三子宏治癸丑進士由翰林改部曹武宗時擢山西參政壺關盜起將發兵勦之崇文戒勿輕出諭以禍福多所解散擒其首惡餘黨悉平巡撫保定引疾歸著有兼山遺稿

王尙綱邳縣人進士正德間參政恤民均惠善政累累未幾以親老疏歸居家十九年交薦不起嘉靖中起復參政己丑

大饑上救荒八議一曰愍饑饉乞遣使行部問民疾苦二曰恤暴露乞有司祭瘞消釋厲氣三曰救貧民乞支散庾積秋成補還四月停徵斂乞截留住徵以俟豐年五曰信告令乞勸分菽粟六月推糴買乞令無閉遏七曰謹預備乞申舊例措處積貯勿使廩庾空虛八曰恤流亡乞所過州縣加意存恤勿使羣聚思亂詔施行尋遷浙江右布政去

曹鳳字鳴岐號西野新蔡人成化辛丑進士由祁門令歷陞山西左參政終都察院右副都御史巡撫延綏性孝友清介不御執紼不問貨殖遺愛在民始終不屈身於權瑾士林重之

徐延厯城人宏治十五年進士武宗初爲南京工科給事中奏留劉健謝遷詔繫獄廷杖除名後官山西遷僉事晉副使

平巨盜混天王民頌之卒官

尙衡字一中同州人宏治間進士歷陞給事中遷浙江左參議改山西駐平陽平陽故藩邸多馮籍以攘民衡力禁之盜王常聚西山設計擒殺散其餘黨移守冀甯流賊寇河東太原甚急衡檄指揮賈彪設伏盤駭坂下賊走冀南又檄官軍追賊賊自壺關遁去後左遷漢陽卒

馬應祥字公順山東高宛人宏治丙辰進士外任以循良稱後命山西督屯時屯田子粒多負欠併徵實難應祥謀諸撫按許他物相準即以給士卒甫三月完十六七撫按獎其賢尋擢按察副使頻上疏乞休爲歸畊園鵲咏自娛

趙佑字汝翼雙流人宏治九年進士爲御史力劾中官劉瑾指爲奸黨勒罷之後起山西僉事卒

趙漢字鴻遠平湖人正德六年進士爲給事中好直言出爲陝西右參政告歸入之以故官起山西不數月復致仕

秦偉三原人正德戊寅任雁門兵備副使剛直不畏權右小吏貪墨及強宗怙勢者望之斂跡

張文魁字元甫河南蘭陽人正德戊辰進士由部曹累陞山西按察司僉事巡冀北道勘劾權要無所徇嘗修沿邊險阻遇伏於橋頭堡以護兵直前迫之皆遁去胡中丞銳薦其才陞布政司左參議復守冀北宜民之仁足飭之才擊強之威可方古人陞陝西行太僕寺少卿大同副總兵以鞍馬金器馳賀文魁曰吾不以易地易介也卻之後陞右布政使以都御史致仕卒

以上正德年

江潮字天信貴谿人宏治己未進士嘉靖四年以文武才被

薦拜都察院右副都御史巡撫山西兼督三關軍務下車未數日卽行邊閱城堡堅瑕芻粟豐約與諸將士勇怯策緩急而弛張之居二年寇不敢近太原人李福達以妖書惑衆聚黨至數千人震動三河潮勒兵解之福達操重資逋匿他所潮購捕益急遂詭張寅名入京夜持萬金爲武定侯郭勛壽因匿勛家勛貽書山西部使者爲關說潮捕得其書抗疏陳福達罪狀併劾勛倚掖廷親怙勢藏逆疏三上不報因罷官歸侍太夫人養隆慶初錄其忠贈兵部左侍郎諭祭制辭有持法正妖矢忠遭謗之詔

劉大謨字遠夫儀封人正德間進士嘉靖改元晉陝西副使尋遷四川左參政會三晉大饑以才望素隆巡撫山西卽上疏請出內帑溥振從之遣官齎銀五萬入晉陽時方旱大謨

巡歷所至閭閻民疾苦兼禱請旋復雨民大悅會有議撤備關
官軍者抗疏止之以糾劾參議魏倫忤重臣意致仕後起四
川巡撫卒

曾銑字子重江都人自爲諸生以才自豪嘉靖八年進士爲
副都御史巡撫山西經歲寇不犯邊朝廷以爲功晉兵部侍
郎巡撫如故二十五年夏晉總督陝西三邊軍務議復套爲
嚴嵩構陷識與不識胥痛悼隆慶初贈兵部尙書諡襄愍

孫繼魯字道甫雲南右衛人嘉靖二年進士爲山西參政數
繩宗藩暨遷按察使宗藩百餘人擁馬發其裝見敝衣外無
長物乃載酒謝過二十六年又由陝藩擢右副都御史代楊
守謙巡撫山西繼魯耿介所至以清節聞然好剛使氣總督
翁萬達議并守大同抗章力爭之又貽萬達書曰往歲建雲

中議宰執幾不免近年撤各路兵督撫業蒙罪萬達乞別調繼魯否則早罷臣兵部是繼魯廷議是萬達上怒繼魯騰私書引往事而夏言亦惡繼魯不爲地下詔獄瘦死繼魯爲巡撫僅四月山西人習其前政冀有所設施遽以非罪死咸爲痛惜宗藩有上書訟其冤者卽前奪視其裝者也隆慶初贈兵部左侍郎諭祭葬諡清愍

楊守謙字允亨長沙人嘉靖八年進士練習兵計巡撫山西興舉偏頭老營堡營田薦副使張鎬爲提調營田大興穀價減十五移撫延綏以山西修邊功增俸一級賜金幣有加

蘇祐字允吉濮人嘉靖丙戌進士性和易可親而耿介有節癸巳以御史出按宣大平亂軍丁酉按山西監臨省試以得人稱錄大辟減死五十餘人壬寅擢參政丁未進右副都御

史巡撫山西協守及營田奏功晉秩一等成甯武關城已酉以兵部侍郎總督宣大山西軍務訓練精勁壬子老營堡獻捷晉從二品秩賜金幣癸丑進右都御史寇二十萬衆夾大同南下將入內關祐提兵馳赴永安堡遇戰奏捷祭告郊廟榜示九邊晉兵部尙書致仕歸

許論字廷議靈寶人進少子也嘉靖五年進士好談兵幼從父歷邊境盡知阨塞險易因著九道圖論上之上喜頒邊臣議行自是以知兵聞二十九年爲右副都御史巡撫山西隸防秋功晉兵部右侍郎三十三年又以左侍郎出督宣大山西軍務奸人呂鶴初與邱富以左道惑衆富爲俺答謀主鶴因潛伏應州城遣其黨闌出塞外引寇爲偵卒所獲論遂遣兵捕鶴并誅其黨以功晉右都御史再以功晉兵部尙書廕

子錦衣世千戶時邊牆盡撤而守臺請改築於牆外每三百步建一臺詔立從之寇萬騎入山西督軍遮破之朔州川先後俘斬五百三十有奇加太子太保復膺子三十五年兵部尙書揚博以父喪去召論代之三十七年俺答圍大同右衛城數重城中拆屋而爨上密問大學士嚴嵩嵩意欲棄之而難於發言請降諭問本兵論言右衛孤懸絕塞能復其軍馬歲辦五十萬金此彈丸可保也蓋設爲難詞以動上上顧亟措餉發兵易置文武將吏而右衛圍亦尋解論遂削籍後復起卒謚恭襄

萬恭字肅卿南昌人嘉靖二十三年進士四十二年請劇邊自效命以兵部右侍郎兼僉都御史巡撫山西卻龍鬚墩寇又拒退寇于朔州川老高墓事聞資銀幣巡撫故無旗牌恭

請得之又築濱河牆四十里教人以耕及用水車法民大利之浹歲以艱歸後總理河道歸卒恭強毅敏達一時稱才臣楊宗器歸安人嘉靖辛丑進士由庶吉士改諫垣多所建白累擢山西右布政進右僉都御史提督雁門諸關兵務先時三晉羅兵荒至則力圖安攘大計撫綏兵民汰穢清輪節用儲餉嚴埃勵兵關務以飭稍甯者三載歲復大稔晉右副都御史尋命督儲南都以疾卒

陳講遂甯人進士嘉靖間提學副使寬而有制品第士類人咸服其明建河汾書院萃士之良者課業有程多所造就歷官副都御史巡撫山西增築城堡邊境賴之贈兵部右侍郎趙時春號浚谷少舉進士選庶常世宗時以徐階薦召爲兵部職方主事累遷山西巡撫督兵禦寇率以身先斥貪墨省

征徭抑求請絕餽遺曰吾不敢竊府庫以自潤亦不能借府庫以市恩宗藩貴宦相戒無敢犯法以謗歸卒於家

蔡天祐字成之睢州人宏治末進士累遷山西按察使嘉靖三年八月大同兵亂巡撫張文錦遇害詔曲赦亂卒擢天祐左僉都御史代之天祐從數騎馳入城諭軍士獻首惡衆心稍定會尙書金獻民總兵官杭雄出師甘肅道大同亂卒疑見討復鼓譟天祐懼急請再赦兵部議除元惡特遣大臣總督宣大軍務乃命戶部侍郎胡瓚偕都督魯綱統京軍三千人以往瓚等未發而進士李枝齋餉銀至亂卒曰此承密詔盡殺大同人爲軍犒也夜中火起圍枝館出牒示之乃解尋復殺知縣王文昌圖代王府詹王奏乞赦王急擄二郡王走宣府巡按御史王官言亂軍方囂大帥兵壓境是趣之叛也

請急止禁軍容臣密圖乃命璜駐兵宣府頃之天祐奏總兵官桂勇已捕五十四人請止京軍勿遣上責以阻撓令必獲首惡郭鑑等既而璜次陽和勇天祐令千戶苗登擒斬鑑等十一人函首送璜請班師甫二日鑑父郭疤子復糾徐龜兒等夜殺勇家人又燬苗登家璜言非盡殲不可上乃切讓天祐召勇還京以故總兵朱振代之勅璜仍駐宣府無何天祐捕戮徐龜兒等璜遂班師明年正月總兵官馬永等言疤子潛逃塞外將遣勘會璜還言逃卒無足患乃罷勘疤子復潛入城夜焚振第明旦天祐閉城大索獲其黨三十四人悉斬以徇盡宥脅從人心大定事聞資銀幣晉副都御史巡撫如故尋就晉兵部左侍郎召還部尋卒天祐有才智兵變時左右皆賊耳目天祐廣招星卜藝士往來軍中因得其情卒

賴以成功在鎮七年有威德父老立安輯祠

何棟字伯直長安人正德辛巳進士博綜羣籍篤嗜數學商
摧古今如指掌歷陞都察院左僉都御史巡撫大同是時彗
星見於井之未度爲大同分野棟考索象緯圖經疏言彗召
蒼赤期年後當有圍城蹶將之災至鎮申嚴紀律拊循營伍
寇入高山站選將勵兵俘四十九級邊境肅然未幾左遷四
川參議後晉右都御史兵部左侍郎乞休

毛伯溫字汝厲吉水人正德三年進士嘉靖中累官大理寺
丞李福達獄起坐失入褫職起右僉都御史巡撫山西未赴
十八年二月上幸承天詔總督宣大山西軍務大同鎮邊鎮
川宏賜鎮河鎮魯五堡相距二百餘里極邊自巡撫張文錦
以築堡致亂後無敢議修者伯溫曰變所由生以任用匪人

非建議謬也卒營之募軍三千防守給以閒田永除其賦邊防賴焉錄功加太子少保閏七月南征安南後爲兵部尙書削籍卒天啟初追諡襄懋

劉源清字汝登東平人正德甲戌進士偉幹負氣臨義敢爲以僉都御史巡撫宣大調度士馬歲省四十萬金北寇大舉入總帥被圍源清冒險遣發斬首虜數十餘級遂遁去滴水崖卒郭春等與民訟辭屈以數百人據城叛源清遣兵傅城呼曰擒春等數人而止守陴者執春等斬之進副都御史再以兵部左侍郎總制宣大尋罷歸卒隆慶初贈兵部尙書賜祭葬

翟鵬字志南撫甯衛人正德三年進士嘉靖二十年俺答入山西內地兵部請遣大臣督軍起鵬右僉都御史整飭畿輔

山西河南軍務兼督餉鵬馳至俺答已飽去而吉囊軍復寇汾石諸州鵬往來馳驅不能有所挫寇退乃召還二十一年三月總督樊繼祖罷除鵬兵部右侍郎代之上疏言將吏遇被掠人牧近塞宜多方招徠殺降邀功者宜罪寇入官軍遇敵雖無功竟賴以安者當錄如賊眾我寡奮身戰雖有傷折未至殘生民者罪當原於法俘馘論功損挫論罪乃有摧鋒陷陣不暇斬首而在後掩取者反積級受功有逡巡觀望幸苟全而力戰當先者反以損軍治罪非戎律之平皆從其議會降人言寇且大入鵬運乞兵餉上怒令革職閒住因罷總督官不設鵬受事僅百日而去七月俺答復大入縱掠太原潞安兵部請復設總督乃起鵬故官令兼督山東河南軍務巡撫以下並聽節制鵬受命寇已出塞卽馳赴朔州請調陝

西薊遼客兵八支及宣大三關主兵兼募土著選驍銳者十萬統以良將列四營分布塞上每營當一面寇入境游兵挑之誘其追諸營夾擊脫不可禦急趨關南依牆守邀擊其困歸上從之鵬乃濬濠築垣修邊牆九百三十餘里增新墩二百九十二護墩堡一十四建營舍一千五百間得地萬四千九百餘頃募軍千五百人人給五十畝省倉儲無算疏請東至平刑西至偏關畫地分守增游兵三支分駐雁門甯武偏關寇攻牆戍兵拒游兵出關夾攻此守中有戰東大同西老營堡因地設伏伺寇所向又於宣大三關間各設勁兵而別選戰士六千分兩營遇警令總督武臣張鳳隨機策應此戰中有守上從其議且命自今遇敵逗留者都指揮以下卽斬總兵官以下先取死罪狀奏先是鵬遣千戶火赤力率兵三

百不見寇復選精銳一百遠至豐州西北遇牧馬者百餘人擊斬二十三級奪其馬還未入塞寇大至官軍饑餒盡棄所獲奔鵬具實陳狀上以將士敢深入仍行遷賞舊例兵皆團操鎮城聞警出戰自遼患熾每夏秋間分駐邊堡謂之暗伏鵬請入秋悉令赴塞晝地分守謂之擺邊九月終還鎮遂著爲令二十三年正月上以去歲無寇降敕獎之賜襲衣三月晉兵部尙書上倚鵬殄寇錫命屢加而責效甚急鵬亦竭智力然勢不能呼吸應變九月薊州巡撫朱方請撤諸路防秋兵兵部尙書毛伯溫因并撤宣大三關客兵十月寇由順聖川經浮圖峪入鵬在朔州聞警夜半至馬邑調兵食復趨渾源遣諸將禦敵御史楊本深兵科戴夢桂劾鵬逗留遂遣官械鵬坐戍卒而以兵部左侍郎張漢代人皆惜之隆慶初復

官

翁萬達字仁夫揭陽人嘉靖五年進士二十三年爲兵部右侍郎兼右僉都御史代翟鵬總督宣大山西保定軍務謹偵候明賞罰每當防秋發卒乘障陰遣卒傾硃於油察離次者硃其處卒歸輒縛毋敢復離次嚴殺降禁違輒抵死得降人撫之如所親以是益知敵情寇數萬騎犯大同中路入鐵裹門故總兵張達力戰卻之又犯鵲鴿峪參將張鳳諸生王邦直等戰死萬達與總兵官周尙文備陽和而遣騎四出邀擊屢有斬獲寇登山見官兵大集乃引去事聞賜勅獎賚屢疏請修築邊牆議自大同東路至宣府西陽河須帑銀二十九萬上已許之兵部以大同舊有二邊可扼敵騎不當復於三邊內築牆上不聽乃自大同東路天城陽和開山口諸地爲

牆百二十八里堡七墩臺百五十四而宣府亦爲牆六十里
功五十餘日成晉右都御史發代府宗室充灼等潛謀晉左
都御史已會宣大山西鎮巡官議上邊防修守事宜大畧謂
先年山西防秋止守外邊比棄極衝守次邊非守要意併守
之議實爲善經因條上定規畫度工費二者爲修邊之事慎
防秋併兵力重責成量徵調實邊堡明出塞計供億節財用
八者爲守邊之事上悉報許乃請帑銀六十萬兩修大同東
路宣府西路邊牆凡八百里工成予一子官萬達精心計善
鈎校牆堞近遠濠塹深廣曲盡其宜寇乃不敢輕犯牆內戍
者得以暇耕牧邊費亦日省初客兵防秋歲帑金一百五十
餘萬添發且數十萬其後減省幾半又議掣山西兵併力守
大同巡撫孫繼魯阻之上爲逮繼魯萬達更事久上深倚之

所請無不從八月俺答犯大同不克退攻五堡官軍戰彌陀山卻之趨山西復敗還尋以宣撫曹家莊功晉兵部尙書兼右副都御史召理部事艱歸卒隆慶中謚襄毅萬達臨陣嘗身先士卒尤善御將士得其死力嘉靖時邊臣行事適機宜建言中肯綮者萬達稱首

劉祐字淑修東萊掖人嘉靖癸丑進士巡撫大同大同爲九邊要害地去寇最近俺答吉囊方相繼深入陷石州屠昌黎塞下岌岌咸爲祐難之祐諏咨利害得其要領謂雲中西聯東勝東逼右衛聲勢遼曠自東勝內徙以地于敵五堡之役復以兵亂不終遂孤懸不支宜乘時聚落番休控險成犄角之勢漸復五堡援右衛屯田訓士且戰且守庶有甯宇於是相地形增亭障稽覈耗漏率勵勇敢戒諸將各守分地毋輕

出塞邊政大舉寇不得利引去間一入寇督兵禦之俘斬數百奪馬牛羊千數捷聞賜白金文綺陞俸一級寇自是稍挫其部落多來降祐疏請便宜處置千人以上則爵其魁游徼卒敢遮掠者罪制曰可當是時微祐雲中幾殆然祐治軍嚴諸執袴子弟不得竄籍冒功遂騰蜚語祐亦以念母甚移疾乞歸時年四十三

楊博字惟約蒲州人嘉靖八年進士三十五年兵部尙書許論罷起博代之博未終喪疏辭而上以大同右衛圍急改博總督宣大山西軍務博墨綬馳出關未至侍郎江東等以大軍進寇引去右衛圍六月守將王德戰亡芻粟且盡士死守無二心博厚加褒卹奏行善後十事事訖當還以給事中張學顏言留博鎮撫奏獨被寇租因僉其丁壯爲義勇分隸諸

將博以邊人不習車戰寇入輒不支請造偏箱車百輛有警則右衛車東左衛車西使相聲援又以大同牆圯繕治爲急次則塞銀釵驛馬諸嶺以絕窺紫荆路備居庸南山以絕窺畿甸路修陽方神池諸牆塹以絕入山西路乃於大同牛心山諸處築堡九墩臺九十二接左衛高山站以達鎮城濬大壕二各十八里小壕六十有四五旬訖功賜勅獎賚上數欲召博還又虞邊以問大學士嚴嵩嵩素不喜博請令江東署部事俟秋防畢徐議之遂不召是歲秋防訖給事中王文炳請召博還上以邊防非博不可命加太子太保留鎮如故呼素把伶及叛人了都記等數以輕騎寇邊博先後計擒之又數出奇兵襲寇寇稍徙帳因議築總督翁萬達所創邊牆招還內地民爲寇掠者千六百餘人又請通宣大荒田水利薄

其租報可旋移薊遼總督後晉吏部尚書少師致仕卒贈太傅謚襄毅

江東朝城進士累官兵部右侍郎嘉靖間總督宣大軍務抵任邊兵大入犯雞鳴勢猖甚東選銳士出其不意擊退遂由故道出塞以原官召還部視事三十七年春大同右衛圍急數月餉道不通復以東總督軍務上諭曰右衛久困朕聞城守將變爾勵精急圖之東設策得通餉城中士氣百倍選集主客兵數萬圍乃撤東卽日入衛城所運糧凡四千餘石軍民感泣呼聲震地進兵部尚書協理戎政尋復總督宣大軍務邊患少蘇上遣中使饋食璽書褒獎四十四年卒於懷來贈少保謚恭襄

趙炳然字子晦劍州人嘉靖十四年進士爲御史與給事中

李文進聚宣大山西兵餉効前後督撫樊繼祖史道監司楊銳指揮馮世彪等一百七十七人侵冒罪坐謫有差條上備邊十二事後以兵部尙書兼右都御史總督宣大山西軍務新平平遠保平三堡密邇宣府舊屬大同天成相去六十里孤懸塞外隔崇山寇騎時出沒炳然慮其不守奏添設參將別爲一營詔如所請尋以馬芳等効敵功被賚已召還部代楊博爲尙書加太子少保隆慶初乞休卒贈太子太保諡恭襄

侯鉞字義甫東阿人金丞相摯之後嘉靖辛丑進士魁岸有大度論事侃侃由工部郎中出爲山西屯田僉事擢山西副使整飭陽和兵備大將軍仇鸞行邊司道皆伏謁鉞獨長揖不伏鸞初不悅及與語縱橫指畫旁若無人鸞奇其才謂軍

門曰此中嶽嶽侯君一人兵備三月拜右僉都御史巡撫大同致仕歸常與田夫漁父揮鋤分畝相娛樂過者不知其爲故中丞也

王忬字民應太倉人少以文學名三吳嘉靖二十年進士以御史監河東鹽法歲餘復巡視諸省甲寅上手勅吏部命忬撫大同比至鎮上書具言歲祲乏軍興狀請大司農金錢十餘萬賑之活者萬計會寇入與總督許合兵徼破之捕首虜百餘馬牛羊稱是捷聞進兵部右侍郎終右都御史兼兵部左侍郎嵩黨巧詆以罪卒後子世貞白寃復其職

毛鵬字汝南棗強人嘉靖間進士授江陰知縣拜御史巡按宣大酌時宜條邊務百六十餘疏累陞甯夏巡撫濬水利設亭障人咸效死巡撫山西提督屬門等關爲治一如陝西方

依爲長城以盡瘁邊事遘疾乞歸竟不起年僅四十有四鵬體貌魁梧丰神爽朗賦性剛介持身端嚴博典籍工詩文經濟醞藉尤爲時所推重未竟其用而沒中外惜之

馬錄字君卿信陽州人正德三年進士爲御史嘉靖五年出按山西而妖賊李福達獄起福達崞人初坐妖賊王良李鉞黨戍山丹衛逃還更名午爲清軍御史所勾再戍山海衛復逃居洛川以彌勒教誘愚民邵進錄等爲亂事覺進錄伏誅福達先還家得免更姓名曰張寅挾重貲往來徐溝間輸粟得太原衛指揮使子大仁大義大禮皆冒京師匠籍用黃白術干武定侯郭勛勛大信幸其仇薛良訟於錄按問得實檄洛川父老雜辨之益信勛爲移書錄祈免錄不從偕巡撫江潮具獄以聞且劾勛庇奸亂法章下都察院都御史聶賢覆

如錄奏詔福達父子論死妻女爲奴沒其產會給事中王科
鄭一鵬程輅常泰劉琦鄭自璧趙廷瑞沈漢秦祐張遠陳皋
謨御史程啟充盧瓊邵幽高世魁任瀘南京御史姚鳴鳳潘
壯戚雄王獻評事杜鸞刑部郎中劉仕主事唐樞交章劾勛
謂罪當連坐勛累自訴以議禮觸衆怒爲言上心動張璫桂
萼復合謀騰蜚語謂諸臣交結借端陷勛上深入其言而外
廷不知攻勛益急上益疑命取福達等至京下三法司訊旣
又命會文武大臣更訊之皆無異詞上將親訊以楊一清言
止仍下廷鞠刑部顏頤壽等不敢自堅改擬妖言律斬命法
司俱戴罪辨事遣官往械錄潮及前問官布政使李璋按察
使李珏僉事章綸都指揮馬彥等乃反前獄抵良誣告罪上
以罪不及錄怒甚命璫萼方獻夫分署二法司事盡下尙書

顧壽侍郎劉玉王啟左都御史賢副都御史劉文莊僉都御史張潤大理卿楊沐少卿徐文華顧佖寺丞汪淵獄嚴刑推問遂搜錄篋得大學士賈誅都御史張仲賢工部侍郎閔楷御史張英及寺丞淵書詠引罪致仕去仲賢等亦下獄等上言給事琦泰郎中仕佐錄殺人給事中科一鵬祐漢輅評事驚御史鳴鳳壯雄扶同妄奏給事中科遠御史世魁率眾連名郎中司馬相妄引事例乃并下諸人獄收繫南京刑部當會訊時太僕卿汪元錫光祿少卿余才偶語亦逮問等遂肆撈掠錄不勝刑自誣故入人罪等乃定爰書言寅非福達錄等恨勦構成冤獄因列上諸臣罪名於是瑋珏等暨知州胡偉前大理丞毛伯溫副使周宣謫戍爲民間住有差良抵死累證皆戍寅還職錄以故入人死未決當徒上以爲

輕欲坐奸黨律斬等謂張寅未死而錄代之死恐天下不服宜永成煙瘴地緣及子孫楊一清又言錄罪不中死律若法外用刑吏將緣爲奸乃成廣西南丹衛遇赦不宥爲編欽明大獄錄頒示天下時嘉靖六年九月壬午也十六年肆赦諸謫戍者皆釋還惟錄不赦竟卒於戍所隆慶初諸人皆復職贈官錄首贈太僕卿當訊大獄時舉朝不直萼等而以寅福達姓名錯互亦或疑之至四十五年正月四川大盜蔡伯貫就擒自言學妖術于山西李同所司檄山西捕同下獄同供爲李午之孫大禮之子世習白蓮教假稱唐裔惑眾倡亂與大獄錄姓名無異同竟伏誅穆宗初御史龐尙鵬言據李同之獄福達罪益彰而當時流毒縉紳至四十餘人衣冠之禍可謂慘烈郭勛世受國恩乃黨巨盜陷朝紳職樞要者承

其頤指鍛鍊周內萬一陰蓄異謀人人聽命禍可勝言哉乞
追奪勛等官爵優卹馬錄諸人以作忠良之氣由是福達獄
始明

桑喬字子木江都人嘉靖十一年進士十四年爲御史出按
山西所部頻寇躡奏請盡蠲徭賦厚恤死者家參將葉宗等
將萬人至荆家莊陷伏中大潰寇遂深入天城陽和兩月間
五遭寇巡撫樊繼祖總兵魯綱以下皆爲喬劾副將李懋及
宗等六人竝逮治後劾嚴嵩成卒

童漢臣錢塘人嘉靖中爲御史二十年寇大入宣大總督樊
繼祖等掩敗三以捷聞漢臣劾之繼祖等得罪出按山西督
諸將擊卻寇之薄太原者時方劾大學士嚴嵩吏部尙書許
讚明年漢臣與巡撫李珣覈上繼祖等失事狀讚承嵩指因

言漢臣勦遲延嵩遂擬旨鑄珏一階留任謫漢臣湖廣布政司都事舉朝皆知爲嵩所中莫能救也終江西副使

連鑛字伯金永年人由進士選庶吉士出補日照縣庚子以御史按山西議類解額辦錢糧而三晉民力少蘇時秋警方殷兼鄉試重務鑛晝夜勤理疏五上皆切中機宜科目亦稱得人議寢馬地餘銀廣平八郡陰受其惠條陳防寇八事語過切直而上陰重之累陞右副都御史總理河漕以疾歸著有明山疏略燕山漫稿

許宗魯字東侯陝西咸甯人正德中進士嘉靖初以御史按宣大大同將卒驕悍宗魯罪其尤甚者如法將卒帖然先是大監劉祥乾沒邊餉以萬計而罪止罷鎮宗魯請下獄祥大懼卽如數抵還宣大故有大邊正德時以道遠棄不守宗魯

行部至其地盡狀以聞議復爲當事者所沮乃止補築近邊
嗣後宣大失地利難守人始服其先見後以遼東巡撫致仕
構草堂聚圖書其中所著有少華遼海歸田諸集

胡宗憲江南績溪人嘉靖間以進士官御史巡按大同饒機
權裕謀略於兵事尤諳練其按大同關塞險易將卒勤惰具
能深悉其故條畫封守爲國家當一面會倭奴內犯晉副都
御史巡撫浙福江西等處屢奏膚功爲陸鳳儀所誣卒於獄
隆慶初詔復其官賜祭葬

詹榮字仁甫山海衛人嘉靖五年進士以戶部郎中督餉大
同值兵變殺總兵官李瑾總督劉源清率師圍城久不下榮
素有智略善應變叛卒掠城中無犯榮者外圍益急榮密約
都指揮紀振遊擊戴謙鎮撫王甯同盟察叛卒馬昇楊麟無

逆志乃陽令甯持官民狀詣源清所爲叛卒乞原而陰以榮謀告請宥昇麟死畀三千金俾募死士自效會源清已罷巡撫樊繼祖許之昇麟遂結心腹擒戮首惡黃鎮等九人榮乃開城門延繼祖入復捕斬二十六人錄功擢光祿寺少卿後遷右僉都御史巡撫甘肅二十三年以大同巡撫趙錦與總兵官周尙文不相能詔榮與錦易任俺答數萬騎入掠榮與尙文破之黑山陽晉右副都御史寇復大舉犯中路參將張鳳等陣沒榮與尙文及總督翁萬達嚴兵備陽和而遣騎遙擊多所殺傷寇乃引去代府奉國將軍充灼行剽榮奪其祿充灼等結小王子入寇謀據大同榮告尙文捕得皆伏辜又築東路邊牆設墩堡請召軍佃作寇再入犯與尙文破之彌陀山斬一部長榮先以靖亂功晉兵部左侍郎又以繕邊破

敵累被獎賚召還理部事閒住卒

盧煥光山人進士嘉靖間巡鹽嚴重有方略稱名御史西姚劇賊聚眾盜鹽爲蠹煥不動聲色而靖之興起人文三省皆蒙教澤學校誦之不衰

余光祁門人進士文望冠西臺著作高古視嵯河東剔弊釐奸不畏強禦建正學書院加意作人雖童子亦擇師教之喻時光州人進士嘉靖間巡鹽時奸民誘宗室亂法者立置之法興風雨雷雲之祀課士多成名

尙惟持羅山進士嘉靖間巡鹽自奉節儉官方肅清商人以時挈支私販一切斷絕故一年而徵十年之逋修書院立社學建名宦鄉賢二祠周子衿之匱乏給老病之資藥瑞鹽盛生禱雨多應人謂盛德所感

李楨新昌進士嘉靖間巡鹽時邊餉火急赤地千里楨體仁行恕正鹽籍遏私販督撈採辦功罪徧喻所司緩刑薄賦且於院前開道樹坊寓賑於役又有教育多士之功

黑滋諸城進士嘉靖間巡鹽時值地震之後凡廟祠公署悉爲修理池不生鹽已十載餘滋爲渚水以養其源落流以潤其涸獲鹽十倍於昔且清池築堰雖藩府之怨不恤

王諍永嘉進士嘉靖間巡鹽抗直不阿有古大臣風以冰蘖名堂蓋自砥也值大旱禱雨祈鹽引躬切責甘雨大霑鹽花盛生時鄆茂卿爲嵩私人總巡天下鹽政盡括民財以媚上欲加賦河東諍抗議而沮士民至今德之鄆至安邑令治具看席三十餘諍大怒立命撤去務從儉約宴罷卽具餞以促其行鄆屏氣而去

曹蘭咸甯人正德間進士歷山西布政使時大同叛變蘭毅然獨往履險決策賊不敢犯

張文奎字應光陝西洛川人正德丁丑進士性沈毅而慈仁由部曹陞四川按察司僉事己丑量移山西按察使司督理屯田時參將謀違例占種人不敢詰文奎按劾不貸屯政就理以賢能薦再奉璽書飭兵石隰武備聿修後晉山西左布政使廉節愈厲革加耗裁公費晉省以甯內艱歸

吳嶽字汝喬汶上人嘉靖十一年進士累官山西副使又爲山西右布政使竝以清靜得民仕至南京兵部尙書參贊機務卒贈太子太保諡介肅嶽清望冠一時戶部尙書馬森嘗曰平生見廉節士二人嶽與譚太初耳

江曉浙江仁和人進士嘉靖間山西右布政爲政持大體端

方自居而與人以和終工部侍郎贈尙書

王宗沐字新甫臨海人工詩文嘉靖二十三年進士累遷山西右布政使所部歲祲因入覲上疏曰山西京師右腋自故關出正定自忻代出紫荆皆不過三日宣大之糧雖派各郡而運本色者皆在太原饑民一聚蹂踐劫奪歲供宣大兩鎮六十七萬餉誰爲之辦此可深念者一也四方奏水旱者以十分上部議常裁而爲三所免不過存留者而已今山西所謂存留者二鎮三關之輸也其所謂存留乃反急于起運是山西終不蒙分毫之寬此可深念者二也開疆萬山之中巖阻巉絕太原民不得至澤潞安望就食他所獨正定米稍可通然背負車運率二斗而致一斗甫至壽陽則價已三倍矣是可深念者三也饑民相聚爲盜招之不可勢必撲殺小則

支庫金大則請內帑與其發帑以賞殺盜之人孰若發帑使不爲盜此可深念者四也近邱富往來誘惑邊民妄傳募人耕田不取租稅愚民何知急不暇擇長邊八百餘里誰要之者彼誘而眾我逃而虛此可深念者五也因請緩征逋賦留河東新增鹽課以給宗祿萬厯中累遷刑部左侍郎閔視宣大山西諸鎮邊務歸卒諡襄裕子士崧巡撫大同

李僑字子高山東人性端而守恪由進士歷任按察使進山西左布政使山西三面距寇民無甯居僑保釐三載流亡漸歸邊境賴之然竟以耿介不悅于當路投紋歸

閔楷任邱進士嘉靖間爲左布政使政尙廉平治持體要雅稱旬宣之任官至侍郎

楊惟聰直隸同安進士嘉靖間山西右布政持已嚴毅悉民

疾苦路見貧寒時爲周給仍檄有司各加存恤惟於強宗貪吏不寬假人咸德之

戴鰲字時重鄞人正德乙丑進士由部曹歷陞江西參政尋陞山西按察使振飭憲典官僚憚之有閹豎殺人匿宗室家吏不敢問鰲卽收捕付獄聞者悚息有巨商持宰相書來告逋欠者輒焚書杖而遣之曰爲朝廷監司甯爲賈豎責券耶有知縣受賕殺人巡按御史知其與權貴有連釋之鰲爲正法乃已尋陞廣西右布政使終四川巡撫坐謗落職歸

傅鑰字希準遼東廣甯人正德間進士授給事中嘗論邊事爲尙書王瓊嘆服曰吾不能言也會宣大將領失利亡卒甚多邊臣以聞廷議遣給事中往覆視之屬鑰上可之曰是嘗言邊事者至鎮考治甄別不隨不苛得實以報副總兵劉進

嘗格敵有功亡卒亦稱而鎗向所請業者於典得免時論稱平嘉靖間累陞山西按察使用法平恕不事操切而專持大體富民某某坐殺人當死獄成後以貨免鎗收鞠之寘於法主簿某知縣某皆良吏以忤當道意爲奸人所構事下按察司或謂鎗云是當道所欲入鎗曰法如此惡以人意出入竟白之終河南巡撫

潘鑑字希古婺源人正德戊辰進士由南京大理評事歷陞山西按察使晉江西右布政使終刑部尙書兼右副都御史儀觀修挺性坦易不爲危言激論而耿介壁立不可干以私治官如家恭勤潔白之操始終一致贈太子太保諡忠襄孫守禮字興立德平人嘉靖八年進士爲儀制郎中故事郡王絕近支得以本爵理府事不得繼封交城懷仁襄垣近支

絕以繼封請守禮持之堅會以疾在告三邸人乘間行賂遂得請旗校調其事以聞所籍記賂遺十餘萬獨無守禮名上由是知其廉再遷山西按察使後爲戶部侍郎又督餉宣大仕至左都御史歸卒贈太子太保諡端肅

吳瀚字受夫洛陽人進士嘉靖間由御史厯遷山西按察使法比精練爲眾推服凡大獄訊決罔留囹圄無淹禁陞右布政轉左使是歲太原有邊警城素無備瀚誓眾分部固守躬督糧出犒師已而援兵四集士獲宿飽眾賴以安又議築關城以固保障晉人德之陞應天府尹尋陞右副都御史巡撫畿甸兼督三關籌邊之略戰守之法必具萬全以馬水口李家嶺爲宜大要衝剗壁築垣增屯置戍備戒孔嚴後敵至浮圖峪不得入議者以爲二堡經略之功後以事忤時回籍

唐龍蘭谿人進士嘉靖間由陝西提學副使陞山西按察使寬而栗威而不猛延見吏民咨諏疾苦黎庶歡洽仕至吏部尙書贈少師諡文襄子汝楫狀元及第

伍全安福人進士嘉靖間鹽運使饒有幹濟每見鹽場掣支強梁挽起懦者被凌蹙乃分定車戶派以三場序以六班魚貫出入眾論翕然利便

李章四川長壽人進士嘉靖間鹽運使性寬而政和每值採鹽民私相謂曰勿怖恐李使君知之不日而數盈焉

方豎參巴陵人嘉靖間爲運使節已勤民修城而一人不擾掣引而三場均給葺禁垣捕私販民建祠以祀

唐益麻城人進士嘉靖間鹽運使幼有志行聘未婚而女失明或謂宜改圖瑩曰我聘而改圖誰復聘者竟娶之是歲擢

魏科及爲運使多惠政每旱撈有禱必應又常修卓刀等堰裨益不淺

袁士偉肥城人進士嘉靖間鹽運使操守光大兼有通才在司值歲凶道殣相望嘆曰此非朝廷赤子乎乃悉召貧民給以工本令人弛撈採課充數年而存活亦以萬計又增秩祀祭器

柳英巫山人進士嘉靖間鹽運使倜儻剛直除猾吏剔弊端勢要豪商莫不斂手屏氣監臨直指亦雅重之爲運使九年邊無匱餉囊無餘貲兩入覲皆以廉能課最

胡松字汝茂滁州人嘉靖八年進士累官山西提學副使三十年秋上邊務八事謂去秋俺答掠興嵐卽傳箭徵兵剋期深入守臣皆稔聞之而巡撫史道總兵官王陞等備禦無素

待其歷境始以求貢上聞又陰致賂遣令勿侵已分地冀嫁禍他境今山西之禍實大同貽之宜亟置重典以厲諸鎮大同自兵變以來壯士多逃漠北爲寇用今宜招使歸有攜畜產器械來者聽其自有更給牛種費優復數年則我今捐金十萬可得壯士二萬撫而用之皆勁旅也孰與棄之以資強敵哉大同最敵衝爲鎮巡者較諸邊獨難今宜不拘資格精擇其人豐給祿廩使得收召壯士畜養健丁又久其期非十年不得代彼知不可驟遷必不爲苟且旦夕計而邊圉自固又必稍寬文網非大干憲典言官毋得輕劾以壞其成功至用間之道兵家所貴今寇謀獲於山西者已數十人他鎮類是是故我之虛實彼無不知今宜厚養死士潛縱遣之得間則斬其名王部長及諸用事貴人否亦可覘強弱虛實而陰

爲備又寇貪而好利我誠不愛金帛東賂黃毛三衛以率其
左西收亦不刺遺利于善地以綴其右使首尾掣曳自相狼
顧則我可起乘其敝坐收全勝矣他所條析咸切邊計上嘉
其忠懇晉秩左參政松疏上當事者已惡其侵官及遷擢益
忌之不畀以兵柄令於三關聽用欲牽制之以敗其事寇大
入抵太原給事中馮良知遂劾松建言冒賞無寸功科道張
堯年王珩劾總兵官張達等竝論松虛議無補遂斥爲民後
薦起仕至吏部尙書卒贈太子少保諡恭肅

陳瑞號文峰福建長樂人嘉靖間以進士任山西督學道閩
才博學以興起斯文爲任敵人寇時撫軍以防秋駐甯武藩
臬以齋捧相繼出疆瑞與驛傳道郭斗居守敵計以南關財
貨畢集而卑薄易破欲并力攻瑞分守南關出庫中兵器授

士卒發金錢懸賞格舉礮火揚軍聲敵不敢前引去既退更爲修築使高厚與內城等瑞以文學臣任城守責論者以爲難今祀三公祠中

閔煦直隸任邱人嘉靖間以進士任山西提學僉事先器識後文藝以修明教化爲務嘗取晉名宦鄉賢汰僞存真輯正祀考一書而序以行世略謂考之慎斯正之嚴正之嚴斯祀之當夫然後淑慝辨而鑒戒昭後歷山西按察使布政使最後爲巡撫胥爲晉人愛戴云

周斯盛甯州人嘉靖間以進士任山西提學副使築河汾書院集雋異士肄業其間月有課季有試文教大興於病者醫治之婚喪不舉者賑貸之其有規言矩行束修自好者則又特爲尊禮以示優異校士之暇以通志爲文獻攸關力爲搜

採纂集成書中間於鄉賢節孝更極慎重離任後諸生立祠祀之爲人貌恭而氣和敦本尙質

王汝孝東平人進士嘉靖間提學副使雅量不苟教人敦行尙實刊諸禮輯覽士知遵守聞喪卽日就道時雨雪泥濘中諸生泣送不忍捨

應良字原忠仙居人正德六年進士爲編修受學王守仁嘉靖初爭大禮廷杖張璁出爲山西副使謝病歸卒

陳大綱慶陽人震子正德間進士任山西僉事土豪陳卿據青羊山作亂中外震恐勦撫未決獨大綱與都御史力主勦滅以威奸宄人頗難之大綱作平賊方略六篇地形險易斷山伐木爲飛梯望樓出其背三軍拔援而上賊聞駭曰官軍飛上山也卿遂降陞密雲兵備

高叔嗣字子業祥符人嘉靖二年進士歷稽勳司郎中出爲山西左參政斷疑獄十二事人稱爲神遷湖廣按察使卒叔嗣工詩蔡汝楠推爲有明第一

王儀字克敬文安人嘉靖癸未進士由靈壁知縣歷陞山西布政司參政守冀甯寇突清源城下儀令洞開諸門寇望之疑有伏宵遁乃檄部中無城者築無糧者蓄無兵衛者選練於是榆次平定之間皆有城寇戒不敢犯宣鎮缺巡撫廷議推儀以僉都御史往講畫戰守利弊邊政一新

宋景字以賢奉新人宏治末進士嘉靖中累官山西副使民饑爲盜殺守禦指揮景樹幟令被脅者赴之賊咸歸命乃擒斬其魁四遷山西布政使仕至左都御史卒

李良字遂伯長清人嘉靖己丑進士孝友勤學由推官歷陞

山西參議副使後巡撫宣府外禦強寇內制橫軍邊圉晏然
上奏疏數十皆切要又見屯戍單寡建併守之議年五十一
卒於家

靳學會濟甯人爲山西副使治績有聞

王喬年高密人進士嘉靖間分巡冀甯道時值荒旱土賊竊
發以定襄段木山爲巢穴喬年設謀誘之夜襲其營生擒四
十餘人殺傷甚眾餘黨解散境內乂安

郭斗號麓池雲南人嘉靖間以進士任山西驛傳道副使風
姿純粹居官清理宿弊立招商法使自供役遠近稱便敵騎
破驢皮窰口分道入寇斗傳諭居民令悉避入城而躬自登
陴守禦敵知有備遂中沮已遇旱請于兩臺人給以粟晉人
祀之三公祠中

高紳字允升安陸人抱奇負氣人如其文丙戌進士由縣令累遷按察副使山西參政山西內外儲寄在參省紳緩急有序治黃冊老吏不敢弄法按察使職列外臺紳挈持維綱鋤削荒類治獄虛聽實求民用不寃終右副都御史卒於家王獻字惟臣咸陽人爲御史有論釋大禮諸放臣及論罷南都添設鎮守二疏人多稱之按察山東建海運議旋有山西左參政之命因之中止初使山西清理軍伍稽察案牘究心所事卽行陳充足淹弊釐革其再按山西也時值薦饑且罹寇患下車卽請帑施賑民藉以生修武備振士風飭官常裕錢穀諸所設施憲度斬斬其決晉藩襲封之疑以杜爭端陞潞安州治爲府以弭宿患尤人所推論者後罷歸胡賓字汝觀光州人嘉靖乙未進士性莊重立朝無所依附

庚戌由太僕寺丞擢山西僉事會當防秋急詣繁峙激厲將士督修城堡嚴守備壬子聞母喪卽日奔歸後陞山西副使未至任疾卒

陳洪澤字元卿臨川人以進士授主事累陞山西左參政泄冀南擒寇偵者一人又捕白蓮教諸賊特賜帑金仕至都察院右副都御史乞歸

宋清浙江開化進士嘉靖間山西參政其先守太平廉正撫字剖決如流有宋一刻之號及參大政存大體不以苛察爲明仕至南贛巡撫致仕歸里

韓邦靖字汝度朝邑人與兄邦奇同登正德三年進士嘉靖初爲山西左參議分守大同歲饑人相食奏請發帑不許復抗疏千餘言不報乞歸不待命輒行軍民遮道乞留抵家卒

未幾邦奇亦以參議涖大同父老因邦靖故前迎皆泣下邦奇亦泣秦晉人盛傳之

孫璽字朝信平湖人正德戊辰進士性寬厚持重內剛外和不通權要歷陞山西參議仍落僉事嘗奉命丈皇莊草場地土清其地之爲奄戚所漁奪者悉歸之民大同經兩亂後卒伍驍悍少不當意輒負怙跳躑以爲常璽巡大同盡心撫馭人賴安堵頃之吉囊入寇斬首多以贊畫功賜金後罷歸以詩白娛有雲山履歷稿

楊華字子實隴西人正德丁丑進士山西按察司僉事值岢嵐寇發撫按以華往不旬日渠魁悉殄脅從盡釋撫按獎其功又以河東累值凶荒請勅專以華分巡河東弭盜安民時論偉焉年未六十乞休

周滿字謙之廣漢人嘉靖壬辰進士庚辰以山東副使奉命清保薊宣大山西五鎮邊儲鉅細畢詳閱尹耕所撰鎮誌酌裁於心力主募兵不如養兵擺邊不如合戰上疏言山西等省民兵之利弊悉用其言癸丑陞山西參政駐節甯武選練日勤寇不敢度關上廣鹽利同文教嚴內備查冗匱四事上俞行之乙卯轉陝西右布政使丙辰又轉山西左布政使終右副都御史乞休卒

程紳字伯書樂安人性孝友嗜學嘉靖戊戌進士除長治縣會大旱禱雨輒應擢刑部主事由僉事遷山西布政司參議守河東道蒲州城西逼黃河河侵勢甚危紳亟築之數月告成蒲人誦其德俗競修靡婚葬非大備不舉紳嚴禁約月餘喪葬合子女者數千家舊藩參不與戎事巡撫檄紳守要害

賊畏威不敢犯守城堡二十餘處悉爲保全晉山西按察司副使奉勅總理紫荆等關保定等地方兵備日夜營戰守具務在萬全寢食俱廢乙卯疾卒於官

劉涇字次山河南人少學於何柏齋之門以進士入史館後晉山西按察副使潞安兵備分巡冀南嘗與防秋駐師雲中八角堡時北部入犯激眾固守以身爲長城屹不可動敵遂退尋以他事落職歸

趙祖元字宗仁葵人嘉靖甲辰進士由教授累陞山西按察司僉事丙辰地震河東蒲州境覆壓過半盜乘之蝟起抄劫盡行祖元設方略解散其黨而悉籍其金錢之無主者數十萬官貯之且新其城塹境以無事俄遷江西參議復遷山西兵備副使以憂歸

車純字秉文上虞人博綜經史冥心元悟以易學爲時宗正德丁丑進士累擢山西布政使司參議分守大同大同故扼邊而險時戍卒稱亂寇薄近郊純轉餉調兵多方經略文武大吏倚如長城因著備邊論若干篇歲稔民饑純發邊儲賑之而處補其闕蘇活無算後巡撫湖廣所攜惟圖書數篋而已著有百山集解組稿乞歸二十年而卒

南逢吉字元真陝西渭南人嘉靖間以進士累官大同兵備副使時邊務廢弛將士無能知陣法者逢吉授以奇正方員諸紀律早夜練習爲制敵具按舊志盡復演場之爲豪右侵據者數巡三關外簡部伍嚴亭障旗幟壁壘煥然一新敵人遠徙又條上便宜五事多觸忌諱執政者格弗上中以飛語罷官歸逢吉與兄大吉俱受業王陽明爲高弟當時以二難

目之

陳伯安錦衣衛人嘉靖己丑任代州兵備副使伯安先爲御史抗太監劉瑾謫外任漸起刑部郎中諫南巡罰跪門者五晝夜居代時更持風裁儲糧修邊隱然有方面之重

郭宗舉福山人嘉靖戊戌任代州兵備副使自奉儉約而法令嚴整兇豪潛伏撫民以恩有隱戚得自達聞訃奔喪卽日徒步歸哀慘備至送者萬餘人中坐搆戍隆慶初起廢厯南京兵部尙書

王鎬字宗周澤州人嘉靖間進士授評事選御史出爲山西副使兵備代州時有邊警而代當其衝鎬禦備免患銜者媒孽其間左遷湖廣轉山東復轉山西副使湖廣布政都御史巡撫甯夏忤嵩歸里

王遵字繼津霸州人嘉靖二十六年進士爲兵部員外郎爭楊繼盛事忤嚴嵩遷僉事再遷岢嵐兵備副使有威名爲巡撫所忌劾去官民相率訟寃詔許起用仕至兵部尙書歸卒贈太子太保追諡恭肅

李綱武功舉人嘉靖間岢嵐兵備道慷慨剛直風紀肅然州牧參戎不相能裁之以法各自悔罪

以上嘉靖年

右明洪武至嘉靖一百九十七人

劉澤濟甯進士正德間分守冀甯道時朝廷有事西北保德係津要六軍扈從供億不貲澤來總其事調度有方凡船艦芻粟等務不盈不乏親按其擾民者又償牛羊價值檄旁郡協濟居者以甯逃者以歸旋車之日焚香稽首盈於途

補遺

山西通志卷一百三